

KOPI MO FAASAOSAOGA TALAFEAGAI A SUI USUFONO

ASO GAFUA, 17 AOKUSO 2015

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amataliaina nei Tualumaga a le Fono Aoao Faitulafono.

I lou agaga faaaloalo ou te faafeiloai atu i le paia ma le mamalu mauuluga o le tatou Maota Fono i lenei taeao, i le alafai mai i le soifua manuia sui usufono mamalu uma o le tatou Maota Fono nei, ma le mamalu masani i le mauuluga o le tatou Palemene. Afio lau Afioga i le Palemia ma lau Kapeneta, lau Afioga i le Taitai o le Itu Agai ma sui usufono mamalu uma o le tatou Maota Fono i lenei taeao fou. Malo le soifua.

E i ai le talitonuga ua lava la outou faasiliga malosi i le tatou feagai ai ma le tatou malologa i le faaiuga o le vaiaso. Sa tatou feagai ai foi ma le tatou galuega umi sa tatou feagai ai i le vaiaso ua tuana'i atu a o lea ua tatou taunuu mai lenei taeao fou ma le taeao manino aua le faaauauina o le tatou galuega. E momoli atu le faafetai tele i le onosai mai ma le tauavagameaina o le tatou Fono i lenei aso i le paia ma le mauuluga o le tatou Maota Fono. E i ai le talitonuga masalo o le tatou aso mulimuli lenei e tatou te fonoa ai le tatou Maota Fono lenei. Ua le toe na ma le laina ua maea ona fai le tatou Sauniga Lotu Faapitoa e faafetai ai le Atua ona o Lona alofa ma Lona agalelei i le taitaiina mai o futia ua sola ma aso ua alu, i le paia ma le mamalu o tupu ma ee sa agai mai e tautuaina Samoa e ala i le latou tofa ma le faautautaga oo sa fofola ai le fala o Samoa i totonu o le Maota Fono lenei, peitai, amuia le tatou Paeaiga o lea ua tatou faaiu mea. Ua faaiu le tatou Paeaiga i le tuu aloaia i lalo o lenei Maota Fono ua loa lona tautua mo le atunuu, e le faaitiitia ai le agaga faafetai i le Atua ona o mea ua Na faia, i le manuia, le filemu ma le saogalemu ma le tamaoiga o lo o foai ia Samoa ona o le tofa tatala e afua atu i le Palemene lenei le faatofalaiga e fai ai tonufai o le tatou atunuu.

E faapai atu foi i le tapuaiga a Samoa, Samoa e, e talitonu le faamoemoe o oe lava o le aomamala, o oe lava o le matua moeao ma le matua moepo i le tapuaiga aua le alofaiva a lou Palemene i tupu ma ee, tamalii ma failauga, o faletua ma tausī, saoa ma tamaitai ma le loaloa o Samoa i ona tulaga faalupe.

E faapena foi ona faapai atu i le Aufaigaluega Paia a le Atua, faafetai tatalo. A o lenei aso tapuai maia ma le manuia o le a alo lou Palemene aua le faaauauina o galuega faaauau ma le tatou polokalame ua faatulagaina.

E faatalofa atu foi i le paia o le tatou atunuu ua tatou faatasi i lenei taeao fou, i Faaluuluga o Matagaluega aemaise Faalapotopotoga a le Malo ua tatou faatasi ona o le faaauauina o tatou o le galuega.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono e iloiloaina ai Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015.
2. Tulafono Tau Faaofi o Teuteuga o le Tulafono o Faiga Palota (Nu.4) 2015.

TUUINA ATU i lou nei Lima i lenei aso 14 o Aokuso i le tausaga 2015.

(Sainia): Tui Atua Tupua Tamasese Efi
O LE AO O LE MALO.

TUSI FAAMAONIA O LE TULAGA FAANATINATI

E tusa ai ma aiaiga o le Tulafono Tumau 99(2) **O AU, TUI ATUA TUPUA TAMASESE EFI, O LE AO O LE MALO,** ua ou tuuina atu nei le Tusi Faamaonia o le Tulaga Faanatinati o Tulafono Tau Faaofi ua faaali atu iinei mo le tagofia e le Fono Aoao Faitulafono i lana Fonotaga o lo o faagasolo nei.

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015.
2. Tulafono Tau Faaofi o Teuteuga o le Tulafono o Faiga Palota (Nu.4) 2015.

TUUINA ATU i lou nei Lima i lenei aso 14 o Aokuso i le tausaga 2015.

**(Sainia): Tui Atua Tupua Tamasese Efi
O LE AO O LE MALO.”**

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA GAOSIA I LE ATUNUU 2015
- faitauga muamua**

Tofa Hon TUILOMA LAMEKO (Minisita mo Tupe Maua): Lau Afioga i le Fofoga Fetalai faapea sui usufono mamalu o le Maota, e auai faatasi i le faafetai ma le faamanu ua tuuina atu e lau Afioga i le Fofoga Fetalai, ua alafai mai i faguga lelei lau Afioga faapea foi le Afioga i le Palemia ma le mamalu o Minisita o le Kapeneta aemaise le Fono Aoaofa Faitulafono. O le viiviiga lea ma le faafetai i le tatou Atua ona o Lona alofa faaauau pea mo i tatou mai lea taimi ma lea taimi.

Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015 i lona faitauga muamua.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Faamasinoga ma Pulega tau Faamasinoga ma le Minisita mo Galuega tau Alamanuia ma Atinae a le Malo.

Na faaamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
FAIGA PALOTA (NU. 4) 2015 – faitauga muamua**

Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu. 4) 2015 i lona faitauga muamua.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Galuega tau Alamanuia ma Atinae a le Malo ma le Minisita mo Tina ma Tamaitai, Atinae o Nuu, Afioga ma Agafesootai.

Na faaamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA GAOSIA I LE ATUNUU 2015
– faitauga faalua**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu, O Le Ao o le Malo e uiga i le Tulafono Tau Faaofi lenei, o lea o le a sagai atu loa le Fono Aoao mo le faitauga faalua.

Tofa Hon TUILOMA LAMEKO: Lau Afioga i le Fofoga Fetalai faapea sui usufono mamalu o le Maota, ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015 i lona faitauga faalua ma ou te fia faia i ai se faamatalaga.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Faamasinoga ma Pulega tau Faamasinoga ma le Minisita mo Galuega tau Alamanuia ma Atinae a le Malo.

Tofa Hon TUILOMA LAMEKO: Lau Afioga i le Fofoga Fetalai faapea sui mamalu o le Maota e le o se Tulafono umi ia le suiga o le Tulafono Tau Faaofi o lo o i ai. O le faamoemoe o le Tulafono Tau Faaofi e Teuteu ai le Tulafono o Fua Faatatau o Oloa Gaosia i le Atunuu 1984 ma o le Tulafono Autu lena. O le sini o le Tulafono Tau Faaofi, o le teuteuina lea o faamatalaga o le Tulafono Autu, ina ia aloaia ai le Tala Faatatau o Tupe 2015/2016, e siitia ai le fua faatatau o lafoga oloa gaosia i le atunuu i mea ua taua i lalo. E i ai le tapaa, ava malosi, vai tuufagu ma le penisini. E na o le lua ni vaega o le Tulafono ma o le vaega muamua o le Tulafono o le fua faatatau: ua aiaia ai le igoa puupuu ma le igoa, e amata faamamaluina ai. Ma le vaega e 2: ua teuteu ai le Faamatalaga o le Tulafono Autu, ina ia siitia ai nisi o Meataitasi i fua faatatau o lafoga o oloa gaosia i totonu o le atunuu.

E pau ia lau Afioga i le Fofoga Fetalai o vaega o lo o talosaga ai le mamalu o outou Afioga i sui usufono mamalu o le Palemene, ina ia suia le Tulafono. Ia manuia lau Afioga faapea le Tualumaga o le Fono Aoao.

FOFOGA FETALAI: Malo saunoa faamalamalama i lau Afioga i le Minisita, e manatu foi ua manino ma malamalama le faatulai mai o lenei Tulafono Tau Faaofi taua, ona o le faatauina o le mamalu ma le taualoa o le tatou Tala o le Tupe e pei ona saunoa ai lau Afioga i le Minisita.

O le avanoa pe a i ai se isi sui usufono e fia saunoa i le tatou Tulafono Tau Faaofi, a leai o le a avatu loa le tatou fesili.

Le sui usufono mo Faleata Sisifo, se i tulai mai le sui usufono mamalu.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga o le Fono i lenei taeao. E faatalofa foi i le paia o le Palemene o Samoa, aemaise le faafofogaaga a le tatou atunuu, malo le soifua mama ma le lagi e mama i lenei taeao. Amuia i tatou o lo o tatou maua se atunuu filemu ma le fiafia ma le manuia mai le Atua.

E talu ai ona o lea faatoa oo mai ia tulaga o fetuunaiga o lafoga, o lea faatoa maua se avanoa e tilotilo i ai, o le ala foi lea o le faatuatuai ona tulai atu. Lau

Afioga ua maea ona pasia le Tala o le Tupe lea e moomia ai le faaopoopoina o tau o lafoga i luga o oloa ia e gaosia i le tatou atunuu. Ae manatua foi lau Afioga, o le tatou Tulafono lea na talanoaina i le vaiaso na tea nei, le Competition Law, pei o i ina le isi vaega lea tatou te tilotilo i ai.

O le manulauti a le atunuu, muamua, ia gafataulimaina ma taugofie le tau o le soifuaga. E mafai ona ausia lea vaega pe afai e faatupuina ma faaopoopo pea ni falegaosimea i totonu o Samoa. Aua e le gata ina taugofie ai ma pau maualalo le tau o le soifuaga, ae maua ai foi ma galuega a tagata. A maua la galuega, ua tele ina foia uma le tele o faafitauli ia e feagai ma le Malo ma i tatou i aso fai pea.

E le mafai foi la ona faatupuina falegaosimea i Samoa pe afai e taugofie pea oloa mai fafo. O lea la ua ou vaai atu i le lisi lea ua aumai lea faatoa amata ona ou faitau i ai, o le amataga lava o le lisi mai le amataga, o lea e muamua mai le vaiinu lea spring water.

Lau Afioga, o le vaiaso na tea nei sa matou talanoa ai ma ni tagata mai Fiti, le Fiji water o lea e omai iinei e promote le latou vai. Ua ou ofo lava pe faapefea ona tupu lea mea. Aua e moni o le vai lea ua tele ina alu i atunuu o le lalolagi a o lea ua tau aumai foi i totonu o le tatou atunuu, a o lea ua tele ma anoanoai foi kamupani fai vai lea e i ai. E lelei, atonu e aumai e alu ai i lalo le tau o le vai, ae faapefea ona aumai le vai mai fafo taugofie atu i lo le vai lea e fai i totonu Samoa?

O le mea lea e ala ai ona taugata le vai e fai i Samoa, leaga e le i faia e tatou le mea lea o le plastic sa le mafai ona fai iinei i aso ia. O lea ua mafai ona fai e nisi o tagata ae laitiiti le volume e fai ai. O le mea la lea na ou lauga ai talu ai lea na ou fai atu ai e faigata ona tauva tatou ma kamupani ia mai fafo leaga e taugata le aumaiga o le atigifagu lea e fai ai le vai i lo le vai.

O mea la ia sa tatau ona fetuutuunai i ai tatou, aua o tatou o le mea lea tatou te mananao i ai, ia taugofie ma faigofie le faatuina o pisinisi iinei i Samoa e maua ai galuega ma tau feoloolo ai le tau ma faasaoina ai le tatou foreign exchange, mea uma faapena. O lea la ua sii, ia pe o le a le afaina ai la le tau o tatou vai lea fai i totonu o Samoa i le faaopoopoga lea ua i ai.

Ona ou oo mai lea i le pia lau Afioga, o le pia, e 3% lea o le alcohol lea ua faaopoopo i ai le tau, e tutusa lava le tau lea ua faaopoopo i le pia e 3% e oo atu lava i le 15%. O le uiga o lau faamatalaga lau Afioga, o atunuu i fafo, o lea ua taumafai e encourage pe faamamafa le pia lea o le light beer le pia lea e laitiiti le alcohol volume content, tau faataugofie laitiiti ina ia fesoasoani ai foi i le galuega a le Soifua Maloloina. A o le mea la lea ua ou vaai atu nei i ai, o lea ua tutusa lava le faaopoopoga o le pia e laitiiti le pasene seia oo atu lava i le pia e 15%. O lona uiga e tutusa lava la le tau, ae sa tatau ona fetuutuunai e le vaega lea ia encourage pia lea taugofie, lea e laitiiti le alcohol e i ai ina ia taumafai e tuutuu mai i lalo aua le taumafa atu i ai o tagata, a o la e feoloolo le alcohol e taumafa e tagata ma encourage ai tagata e inu le pia lea, aua e taugofie le pia laitiiti lea o le light beer i lo le pia lea malosi.

FOFOGA FETALAI: Ia, se i fai se malologa a le sui usufono mo Faleata Sisifo.

Susuga Hon TUILAEPa FATIALOFA AUELUA LUPESOLIAI NEIOTI AIONO SAILELE MALIELEGAOI (Palemia): Lau Afioga i le

Fofoga Fetalai, o le faalavelave lea o lou tauanaua o le sui usufono e tu i luga lea ua matua lauga ai, ae leai lava se mea fou o nei mea.

E ala ona faatumau pea le tiute o mea ia o pia vaivai, aua e tau leai lava nisi e inu ai, e le lava la le seleni a le Malo e maua mai ai. Ua faafia ona ou fealuai e sue se pia e i lalo ifo o le 2%. O le pia ou te inu ai e 1%. O lona uiga na o vai, vai, vai vai, ae e te fiu e sue e oo foi pe a e alu i fafo, e mumusu lava kamupani e fai. E leai la se tupe e maua ai i ina pe tuu lava i luga, e te fiu lava e tuu i luga, o le ala foi lena na fai fai ai a tatou pia maualalo le alcohol content, te i lava lea ua le toe faia i le tele o taimi.

A o le mea lea e ala ai ona matua tuu i luga le tau o le pia lea, aua foi e te fiu lava e tuu i luga i le lagi ae inu ai lava tagata ona feoloolo ai le seleni e maua ai. A o le agaga foi lena e taofiofi ai le tago tele i ai ma soona faaalu ai tupe.

Ia o se fesoasoani atu lena lau Afioga.

Tofa LEALAILEPULE RIMONI AIAFI: Ia, manatua foi le tatou Tulafono Tau Faaofi lenei, e fai lautele aua o le Soifua Maloloina le mea taua. Ia se i vaai la lea ua saunoa le Afioga i le Palemia, e tutusa maua ma te fiafia i le light ae fiu e sue. A o le mea lena e tataua ona encourage e le Soifua Maloloina, ia tuu i lalo le pasene o le mea lea.

Ia vaai la lau Afioga, tai pei la o le vai. Ia o fea se mea ua tutusa le vai, spring water ma le fagu suamalie?

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Lau Afioga i le Fofoga Fetalai, o le fesili atu la i le sui usufono, e te manao la e toe sii i luga? E pei e faapuupuu, a e manao e sii i luga, ia fai sau lafo e tuu i luga.

Tofa LEALAILEPULE RIMONI AIAFI: Ia faafetai. Sii i luga le alcohol e tele ai le content ae tuu i lalo le mea e leai se content. E pei lava o le vai o lea ua tutusa le pasene ua sii o le vai lea natural water ma le vai suamalie. A o lea foi e manao le Afioga i le Minisita o le Soifua Maloloina, ina ia inu lava i le vai auli ae aua le inuina le vai suamalie, a o lea ua tutusa lelei lava le siitaga o le vai suamalie ma le vai auli. O lona uiga, e fiu le Afioga i le Minisita mo le Soifua Maloloina e faalauiloa le vai ina ia taumafa le vai natura, le vai lea auli, aua o lea e tutusa le tau.

Vaai la i le mea matautia lau Afioga i le alcohol volume content lea, a 15% pe i lalo, toetiiti lava \$50.00 le siitaga i le lita, ae a faasolo loa i luga i le tai 50% agai i luga, ua matua pau maualalo lava i le tai \$10+ i le lita. O le a la le tala lea e tuu mai i i? E matua encourage e matua tuu i luga le volume content aemaise le fagu malosi lea e fai iinei e le vaega lea e taamilo iinei lea e fai i le fagupau foi lea, oka se faaletonu o lena mea. O le mea lena lea ua tele ina feoti ai tagata ma mamai tagata Samoa o le fagu malosi lena.

A o lea la e sau i i, a 15% agai i lalo, toetiiti \$50.00, le 15% lea o le alcohol content. Ae a oo loa i luga i le 30% faasolo atu i luga i le 50%, ia ou te iloa po o ai e inu i ia ituaiga mea? E maualalo le tau pe a i lalo o le \$18.00 i le lita. O lona uiga e taugofie le fai o lau fagu malosi i le 60% i lo le fagumalosi lea i lalo o le 30%.

E tataua lau Afioga i le Minisita mo Tupe Maua ona toe tagai i le tulaga lea, aemaise lau Afioga i le Minisita mo le Soifua Maloloina, o le matua tulaga faigata lava. A foi lea ua tatou pasia le faaopoopoga o tariff i luga o mea nei

ina ia maua mai ni tupe faaopoopo a le Malo. A o lau fautuaga lea e aveatu i lau tilotilo i ai, o lea e pei ua le talafeagai ina ia fetuutuunai, ia taugata le mea e maualalo le alcohol content...

FOFOGA FETALAI: Malie le sui usufono se i tuu atu le avanoa i le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, leaga o lea ua taua au i le saunoaga a le sui usufono mamalu e faapea, o lea ua tutusa le siitaga o le vai ma vai suamalie. A silasila lau Afioga ma le mamalu o lenei Maota i le Tulafono Tau Faaofi, e leai lava se mea o sau ai na o le vai. O vai ia e aumai i i, o vai o la e i ai le added sugar po o sweetening stuff e leai lava ma se vai foi lea faapea e leai se suka o i ai.

O le vai lea e saunoa i ai le sui usufono mamalu, o vai auli e leai se suka o i ai. E le o sau i totonu o le Tulafono Tau Faaofi lea se vai auli. O vai ia e sau i i, o vai o la e i ai le suka i totonu. Ia o la e tonu lava le Tulafono Tau Faaofi, faataugata vai suamalie ae faataugofie vai auli. Ma le faaaloalo i lau Afioga.

FOFOGA FETALAI: Sa e faitau i le Tulafono Tau Faaofi Leala?

Tofa LEALAILEPULE RIMONI AIAFI: O le mea la lea o lea ou te fai atu ai i lau Afioga, e a latou Tulafono, ae le faitauina ma le fesootai. Talofa e si ou uso. Fai mai, ia vaai i le pepa lena i le itulau 2, e pei lava o le bracket lena e i ai i le Faamatalaga Lona 2; 2202.1010, lena e muamua lava le suavai auli. Lau Afioga pei o le mea lena lea e taumafai atu ai.

Tofa Levaopolo Talatonu: Lau Afioga i le Fofoga Fetalai, faamolemole o se mea e fia faasao. Ou te talosaga atu i le sui usufono mo Faleata Sisifo pe mafai ona ia faamalamalama atoa mai le Tulafono Tau Faaofi, aua lea e malamalama ia, a o lea e faaletonu mai le Afioga i le Minisita.

Afioga Hon Tuitama Talalelei Tuitama: Lau Afioga, se i silasila i le faa-Peretania, “Water, including Mineral Water and Aerated Waters, containing added sugar.” Toe see ifo i lalo, “Water including Mineral Water and Aerated Waters, containing added Sweetening matter.” E leai se vai auli o sau ai i i, o vai auli o la e ua faaopoopo i ai ma le suka. Ia o se faamatalaga lena.

Tofa LEALAILEPULE RIMONI AIAFI: Lau Afioga, o le a faitau atu la le faa-Samoa, “Suavai Auli, e aofia ai Suavai... Lau Afioga, e i ai le faamamafa upu lena e tau o le koma lena e i le va, ae o lena ua faitau faasoloatoa...

FOFOGA FETALAI: Lealailepule afai ua e sasi tautala sao, o vai auli ua faaopoopo i ai tulaga ia e saunoa i ai le Minisita ona manino lea o le... A ua e sasi faatoese i le Minisita.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Lau Afioga, o le lauga o lo o avatu, o vai suamalie, ae ia maua la le vai suamalie e aumai le vai auli tuu i ai le suka ona suamalie loa lea.

FOFOGA FETALAI: Ia faauma maia le saunoaga Lealailepule o lea ua manino le saunoaga.

Tofa LEALAILEPLUE RIMONI AIAFI: Lau Afioga i le Fofoga Fetalai o lea na tatou pasia le faaopoopoga o le tariff, a o le mea la lea tatou te tilotilo i ai mo le agai i luma ma le tagai i ai a le Afioga i le Minisita mo Tupe Maua, aemaise lava i le Tulafono Tau Faaofi leni. O le Tulafono Tau Faaofi leni o le Tulafono Tau Faaofi faifaatasi a tatou aua e moni e maua ai le tupe faaopoopo i le isi itu, ae toe alu uma lava i tagata mamai pe a faapea e le control e tusa ai o le mea o lo o taumafai i ai le Afioga i le Minisita o le Soifua Maloloina ma le tatou SPAGHL lea ua tatou le iloa po o fea ua oo i ai.

Ia, a o nai mea la na, e oo foi i le sikareti lau Afioga, ia manatua foi e i ai le mea lea na tatou talanoaina i le pepa sikareti, lea e faapea mai ai e fai na o le pepa sikareti 20. Na omai lava le Soifua Maloloina ma le latou mau, e aveese le pepa sikareti 10 e vave ai le ulaula a tagata. Ae faafetai i le Afioga i le Palemia ma tatou o lea ua toe sui, aua o le mea lea e tupu, o lona uiga, a e fia ulaula faapea e te taumafai e reduce lau ulaula, e te muamua e alu i le tamai mea laititi ona tuu atu lava lea ma uma, lea na toe re-introduce mai ai le pepa 10 package foi lea. A o lea na tou faapea mai, leai, fai na o le pepa lapoa, a e manao e faatau sau 10 na o le 20 e mafai ona avatu. Ia o lea foi la e atagia mai i le tatou Tulafono Tau Faaofi i le fetuunaiga o lafoga i luga o sikareti.

Lau Afioga, atonu ua maua ni finagalo o le matou Vaega leaga o lea sa tau faaumiumi lau lauga ae se i faitau manino le suiga o le Tulafono Tau Faaofi. Ia manuia le aso.

FOFOGA FETALAI: Malo saunoa. Na pau lava lea o le mea e fia faamalamalama lau Afioga i le sui usufono, o oe foi o le sui o le tatou SPAGHL, o lena lava tou te vaai i le Televisi o lea lava ou te galue au mo le tatou SPAGHL ae tafao pea oe, e leai se mea o le a e atugalua ai, ae agai pea oe e fai au fuafuaga.

Lau Afioga i le Minisita, e manatu pau lea o le sui usufono sa fia saunoa. Oi, ia malie lava lau Afioga i le Minisita mo Tupe Maua, toe tasi lava le sui usufono lea e fia tulai mai, ona tuu atu ai lea o le avanoa e tali ai lau Afioga.

Tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa, faafetai atu foi i le Afioga i le Minisita mo le faamalamalamaina o le Tulafono Tau Faaofi. E faamalie atu foi pei lava ona saunoa se tasi o sui usufono, ia o lea sa tau vaavaai ona o lea faatoa maua le avanoa e vaavaai ai foi i le Tulafono Tau Faaofi ua faaoo mai.

Na pau lava nai vaega e fia avatu ai se manatu lau Afioga i le Fofoga Fetalai, o le vaega mulimuli lea i sipili ma suauu ua faamamaina ona o lea e vaai atu o lea foi ua siitia mai le 10% i le 15%.

O le faafesili lau Afioga i le Fofoga Fetalai, ona o lo o i ai foi le taumafaiga lea a le tatou atunuu ina ia maua le clean energy ma suauu mama. E maitauina o le tele o le alualu i luma o nei taumafaiga o bio-diesel po o vaega ia. O lau lea vaavaai i ai pe le aoga ona tatou taumafai e faaitiitia tax pe faia ni subsidies pei ona faaalua foi ina ia uunaia ai i latou e mafai ona faatinoina ia suauu mama ma vaega uma ina ia faamamaina. E le gata ina ia faataugofie

ona latou gaosiaina ma maua gofie i totonu o le tatou atunuu, ae o le tele foi o le suauu o le a mafai ona maua e tatou, o le suauu mama ma e le tele se aafiaga o le tatou siosiomaga, aemaise o le tele o aafiaga o lo o faapea foi ona aafia ai le tatou atunuu. Ia o le vaega lea e soso atu ai i le Matagaluega.

Ia ma le tulaga lea, po o le tax lea e uma ona aumai aua e pei o le tele o vaega ia lea e aumai le raw material mai fafo ona faamama lea i totonu o le tatou atunuu, ona maua ai lea o le suauu lelei. O le suauu o lo o faapea ona faaaogaina po o lea la o le a e ese le tax o le import o le.....a faamama ua toe faaopopo ai i luga le isi tax lea, atonu o lea e fia maua ai se faamalalamamaga, afai e double tax la, ia o le a la le aafiaga o le a i ai, faafetai.

FOFOGA FETALAI: Ia tulai mai lau Afioga i le.....

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetalai.....

FOFOGA FETALAI: Oi ia, o le a tuu atu pea le avanoa.

Tofa Aveau Tuala Lepale Niko Palamo: Lau Afioga i le Fofoga Fetalai faafetai mo le avanoa.

Leai o nai mea laiti ia o lea e le i taua i lauga e pei ona i ai nei lea e ala ai ona ou tulai atu lau Afioga.

FOFOGA FETALAI: Saunoa le sui usufono.

Tofa Aveau Tuala Lepale Niko Palamo: Faafetai i lau Afioga i le Fofoga Fetalai.

A ou faitau atu i le Tulafono Tau Faaofi lenei o lo o faapea mai, o le Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015. O lona uiga, o oloa nei e aumai i le lisi lenei, o oloa o lo o gaosia i totonu o Samoa. E i ai le manulauti a lo tatou atunuu o lea e taumafai ai le Malo ina ia faamallosia ia tagata e fausia oloa aua le tamaoaiga o le tatou atunuu. Atonu e fua i le itu e pei ona lauga nisi o sui usufono, e fua i le soifua maloloina, pei o le agaga lena o le Tulafono lenei ua ala ai ona siitia tau o le vaega lenei, ona o lea e fua agai i le afaina ai o le soifua maloloina, ae le gata i lea, ae fua foi i faalavelave ua tutupu tele mai i le pia.

Ou te talanoa la agai i le vai, i le tulaga o lo o i ai nei le siitaga o lafoga ia o le vai pei o lea e i ai le tatou manaoga lea, pei o lea ua tatou taumafai e sii le tau o vaega ia ina ia puipuia ai tagata e aua le o e faaaoga, ae le taumafai e fai ni auala e taofi ai tagata mai le faaaogaina, o le afaina lena o le Tulafono i tagata o lo o faipisinisi. Atonu o lea e tagai le Tulafono i le lautele, ae i ai nai vaega ia laiti e lua ou te fia fesili ai pei ona fesili nisi o sui usufono, e i ai ia pia ia e sau i i e faapea, Other, po o le isi vaega lea 2206.0010 lea e faapea mai, 'I se malosia o le ava malosia i le aofaiga o aofia ai e 15% po o le itiiti ifo, o lea e \$44.00 i le lita.' E fia malamalama po o a tonu lava vaega ia pei ona fesiligia e nisi foi o sui usufono pei ona lauga, o le tele lava o pia ia i luga atu o le 57.12%, o lea na o le \$35.20 le tau i le lita, a o vaega ia o pia ia e faapea mai e i lalo ifo i le 15% a o lea e \$44.00 lona tau, leai na ona ou fesili e fia

malamalama ai, po o a ia vaega ia ua ala ai ona eseese a o le a le mea ua ala ai ona tele foi le tau o lea vaega?

Ma le faaaloalo lava.

FOFOGA FETALAI: Malo. Tulai mai lau Afioga i le Minisita ona avatu ai lea o le tatou fesili.

Tofa Hon TUILOMA LAMEKO: Lau Afioga i le Fofoga Fetalai faapea foi sui usufono mamalu o le Palemene, aemaise foi o le faafogafoga mai o le tatou atunuu o e foi o lo o faafogafoga mai i Tualumaga o le Fono Aoaofaitulafono. Faafetai tele i sui usufono na faaalua o latou finagalo e faatatau i le Tulafono Tau Faaofi.

Ma o le Tulafono Tau Faaofi, a silasila lelei i ai i le tulaga o le Tulafono, o le mea o lo o faamamafa o le tulaga lea i le soifua maloloina o tagata, lea na laga e le tele o sui usufono. O le mea lea lau Afioga i le Fofoga Fetalai, e maitaulia o le tatou atunuu lea o i ai nei aemaise le tatou economy, o lea e taumafai ina ia fausia ia oloa e talafeagai ma le tatou...aia e agai ai i luma le soifuaga o le tatou atunuu aemaise le tulaga o le tatou soifua agai i luma. O le mea la lea lau Afioga, ma o mea foi ia ua saunia e a outou Afioga, e le laitiiti tagata na omai e faaali ni o latou manatu i mea nei, o mea uma lava ia ua outou saunoa i ai, ua uma ona talanoa i totonu e le gata o le Matagaluega o Tupe Maua, aemaise lava i le tulaga taua nei, o le taumafai lea ina ia aua ne i soona faataugofieina ni pia e fausia i totonu o le tatou atunuu, aua e ono afaina ai foi ia le tulaga o le tatou agai i luma.

Lau Afioga i le Fofoga Fetalai o le tali atu lea, ia manuia tele.

FOFOGA FETALAI: Malo.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015 i lona faitauga faalua.

TULAFONO TAU FAAOFI O TEUTEUGA O LE TULAFONO O FAIGA PALOTA (NU. 4) 2015 – faitauga faalua

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu, O Le Ao o le Malo e uiga i le Tulafono Tau Faaofi lena, o lea o le a sagai atu loa le Fono Aoaofaitulafono mo le faitauga faalua.

Tulai mai lau Afioga i le Minisita mo Faiga Palota.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu. 4) 2015 i lona faitauga faalua ma ou te fia tautala faamalamalama i ai.*

Faaluaia e le Sui Palemia, Minisita mo Pisinisi, Alamanuia ma Leipa ma le Minisita mo Fesootaiga ma Faamatalaga Tekonolosi.

FOFOGA FETALAI: Tulai mai lau Afioga i le Minisita e saunoa faamalamalama.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o le Palemene, o le tatou Teuteuga lenei o le tatou Tulafono Tau Faaofi o Teuteuga o le Tulafono o Faiga Palota (Nu. 4) 2015, ia o lea sa faailoa atu i le la vaiaso i le faagasologa foi o le tatou Teuteuga Nu. 3, o le a faapea ona vave tapena mai ia le tatou toe Teuteuga lenei, ina ia laugatasia ai mo itumalo uma le tatou Tulafono foi lea, o le Faaliliuina atu o le Faamauiina, po o le tatou Transfer Rule i le tai lima tausaga lea o lo o i ai i totonu o le tatou Tulafono. I le faavaeina o tatou Itumalo Tu Taulaga, ua pau ai le vaega lea o le Tulafono i le lima tausaga, ma o lea sa molimauina foi e nisi o saunoaga i le Maota i le tatou Fono talu ai, ua faapena ona fesolotai solo ai le au palota, o i totonu toe omai i fafo, toe o i totonu toe omai i fafo mo tatou Itumalo Tu Taulaga.

O lona uiga la lau Afioga i le Fofoga Fetalai, o le Teuteuga lenei o le a faapea ona tamau ai, o lē lava ua faamauiina i tatou o Itumalo Tu Taulaga, o le a faapena foi ona faaogaina le tatou Tulafono i le lima tausaga, faatoa mafai lea ona faasee ese atu pe suia i se isi itumalo.

Ia na o le tolu lava ia Fuaiupu o le tatou Tulafono, ma i le suia lea o le vaega 19 o le tatou Tulafono, o le a faapea ona soloia ai ia le vaega e 22 o le tatou Tulafono Autu.

Lau Afioga i le Fofoga Fetalai, o se faamalamalamaga lea i le tatou toe Teuteuga, ma le faaloalo lava.

FOFOGA FETALAI: Malo faafetai i le faamalamalamaga manino a lau Afioga i le Tamaitai Minisita, e ala i le toe faatulai mai o lenei Tulafono Toe Teuteu, ona o le tele foi o fautuaga sa tuuina atu i le Maota ona o tulaga ua tatou atagia ia le aafiaga tele o lo o faagasolo ai nei le faamoemoe o le tatou lesitalaina o tatou tagata palota. E manatu o lea foi ua manino ma malamalama le tatou Maota Fono. Ia se sui usufono e fia saunoa, a leai o le a tuuina atu le tatou fesili.

Tofa LEALAILEPULE RIMONI AIAFI: Lau Afioga i le Fofoga Fetalai, faafetai lava mo le avanoa, faafetai foi i le Afioga i le Minisita mo le tau faamalamalamaina o le vaega lea. Ae faamolemole, ua fai sina faaluafesasi o lou mafaufau i le tatou Tulafono Tau Faaofi, o lea lava e manino i le lima tausaga faatoa mafai ona transfer ese, a o le vaega lea lona (4), o lea e i ai le tuusaunoaga lea le Section lea e i ai lea e faapea mai, “(4) I le avea ai o se tuusaunoaga i le fuaiupu 16(3) ma le (4), e mafai e se tagata palota taitoatasi ua faamauiina i totonu o se itumalo faaalaalafaga, i o se taimi.” E pei o le mea tonu lea na ou lauga atu ai lau Afioga, o lea lava e i ai i le taimi nei a o le transfer, a, o le uiga o lau tala, afai o lea faatoa liliu mai nei, faatoa lesitala le tagata i totonu o le TC po o le itumalo i le asō, o lau fesili la lea lau Afioga, e mafai ona toe transfer i totonu o le Urban taeao po o se aso a o le i oo mai le palota i totonu lava o lenei Paeai? O le fesili lea, ona o lea ua tuu mai le tuusaunoaga lea i i, pei o le mea lea e toe fesili atu ai, e fia malamalama laitiiti i ai lau Afioga, ona o le mea lena o lea e tupu, o le mea tonu lava lena o lea na ou fesili.

O le isi vaega lau Afioga i le Fofoga Fetalai, faafetai o lea ua tali mai le vaega lea, a o le vaega lea sa laga pea e sui usufono uma o le taulaga, sui usufono uma o le Vaimauga ma Faleata, ia le mea foi lea le aiatatau lea a nai tagata ia e i i mo i latou e filifili latou, pe palota i sui o le taulaga po o i, aemaise nai faifeau lea e tausinnu i totonu o nuu, o lea pei ua le aafia i i, ona o lea pei ua ese le Tulafono lea mo sui o le taulaga ma Faleata ma Vaimauga, ese le Tulafono i nai nuu i tua. E pei o le mea lea ua tatou vevesi ai lau Afioga, o mea nei o le faatulaga fou lenei. Ae faafetai o lea ua toe faamanino laitiiti mai lava le vaega lea lau Afioga i le Minisita ma isi vaega ia na taua e fia malamalama ai.

Ma le faaaloalo lava, faafetai.

FOFOGA FETALAI: Malo. Ia le sui usufono mo Faleata Sasae, sosoo ai ma le sui usufono mo Gagaemauga Nu. 2.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai, faafetai foi i lau Afioga i le Minisita mo le Tulafono Tau Faaofi aua foi nisi o lauga sa fautua atu i lenei Tulafono Tau Faaofi.

E auai lou manatu i le fesili e pei ona fesiligia e le sui usufono pei ona maea nei ona lauga lau Afioga i le Minisita, ona e manaia le faa-Fuaiupu (3) lea e mafai ai ona transfer pei o le vaega tuai, po o le Urban po o le sui o itumalo faaalaalafaga, lea e ogatasi lava i le faa-Fuaiupu e (3), ae sau loa i lalo o le faa-Fuaiupu (4), lea ua ave le avanoa faapitoa lea aemaise lava le upu lea, at anytime, lea ua ave le avanoa e mafai ai e le tagata lea e i totonu o le...e agavaa e palota i le Urban, e mafai ona transfer lava i so o se taimi. O le problem tonu lava lea e tupu i totonu o itumalo nei, aemaise lava itumalo nei o Faleata ma Vaimauga, ona o le afaina i le vaega lea, aua ua leai se residence i totonu o itumalo nei, o lea ua alu i le kinship ua fua i ai le vaega lea. Afai la o lea ua i ai le vaega lea, a o lea foi fai mai le vaega e 4 e faatoa mafai ona lima tausaga faatoa mafai ona e sui, pei o le vaega tuai, ae sau i lalo le Section lea i le Urban, e so o se taimi lava. O le mea lena o lea e tupu nei, o le mea lena o lea e talosaga atu ai, pe le mafai i tagata ia na sui nei e le Urban i lalo o le Tulafono lea i lalo o le 4, pe le mafai la ona toe tuu i o i tagata ia lea e le i atoa le lima tausaga ae transfer? Tagata foi ia lea na palota i le Territorial Constituency ae te i ua transfer nei i le Urban nei ona o le Tulafono Tau Faaofi fou lea, o lea la ua fai mai le 3, e le mafai ona fai, a o lea e fai mai le Nu. 4 e mafai at any time. O lea la e faafesili atu ai i lau Afioga i le Minisita, pe mafai lava ona faamalamalama le vaega lea, ona e fai lava sina afaina ai o itumalo nei o Faleata ma Vaimauga i le vaega lea.

Ma le faaaloalo lava.

FOFOGA FETALAI: Malo o lea ua maua le finagalo o le sui usufono.

Le sui usufono mo Gagaemauga Nu. 2, ona sosoo ai lea ma le sui usufono mo Aleipata Itupa i Lalo.

Tofa LEVAOPOLO TALATONU (Gagaemauga Nu. 2): Faafetai i lau Afioga i le Fofoga Fetalai mo le avanoa, leai e puupuu lava le fesili. Ae le i faia atua lau fesili, e momoli atu lau faafetai tele i lau Afioga i le Tamaitai

Minisita, lea e le i leva atu nei ona avatu se fautuaga foi a lenei itu e toe Teuteu ai le Tulafono, ae faafetai o lena e amanaia lena vaega.

Ae lau Afioga i le Fofoga Fetalai, o lau fesili lava ona o lea e maitauina, o le tele lava o Teuteuga ma le tele o tatou galuega i le Tulafono lenei, o le tau toe faatulaga lelei mai o Nofoa ia e lua a le Palemene. Ae ou te fesili atu lau Afioga i le Minisita e tauala atu i le Nofoa, pe i ai se silasila mamao a le tatou Malo i le tulaga i le soloia foi o ia Nofoa? Aua o le upu moni lava lau Afioga i le Fofoga Fetalai, e leai lava ma se afakasi po o se palagi i totonu o Itumalo Tu Taulaga, o Samoa uma lava ma ua matai uma foi e tau ai i o latou aiga i so o se alaafaga i Upolu nei, pei o le tulaga lea, aua e uma lava o tatou teuteu lava lea Tulafono.

FOFOGA FETALAI: E fautuaina pea le sui usufono o lo o saunoa, tatou agai pea i le Teuteuga o le Tulafono.

Tofa LEVAOPOLO TALATONU: Faafetai atu lava mo le avanoa.

FOFOGA FETALAI: Malo. Ia le sui usufono mo Aleipata Itupa i Lalo, o le avanoa mulimuli ia ona tali ai lea o le Minisita. Oi ia, tulai maia lau Afioga i le Minisita.

Afioga Hon FIAME NAOMI MATAAFA: Lau Afioga i le Fofoga Fetalai, o mataupu ia e laga mai e sui usufono, o le agaga lava ia o le Tulafono Tau Faaofi, aua o lea sa... ae le i toe aumaia le Teuteuga lenei, e mafai lava i tagata ona feoi atu i totonu ma toe omai i fafo o le lola o Itumalo Tu Taulaga.

O le itu muamua la e taua i le tatou suiga lenei, a o atu loa i totonu, tamau ai loa i ina ma faaoga ai le Tulafono Tau Faaofi o le lima tausaga.

O le exemption po o le tuusaunoaga lea e saunoa mai ai nisi o sui usufono, e faatatau lea ia i latou o e o le a siitia mai itumalo faaalaalafaga e sii atu i totonu o Itumalo Tu Taulaga. Ma o i ina la, o lea e faapea mai, “Ona o lea o le a o i totonu o le lola a Itumalo Tu Taulaga ma o ni lola fou o lea faatoa faavaeina, o lea la ua tatala ai le avanoa mo e sa faamauina i lalo o le tatou Tulafono Tau Faaofi mo itumalo faaalaalafaga, territorial constituencies, faatoa mafai lava ona sui pe a faapea ua atoa le lima tausaga.” Ae ona, o lea ua faavae tatou Itumalo Tu Taulaga, o lola fou nei, o lea ua tuu ai le tuusaunoaga lea mo e agavaa sa faamauina o latou suafa i lalo o itumalo faaalaalafaga, e mafai loa ona faasee i le lola o Itumalo Tu Taulaga, pe a faapea e agavaa. O lona uiga, o le alaala lea i luga o fanua umia saoloto. O le uiga lena o le exemption po o le tuusaunoaga lea o lo o i ai i totonu o le tatou Tulafono Tau Faaofi.

Tofa Lealailepule Rimoni Aiafi: Lau Afioga i le Fofoga Fetalai, faafetai lava i lau Afioga i le Minisita. O lea tonu lava la ua faamalamalama mai i i. O le mea tonu lea na matou lauga atu ai, lea ua sau tonu ai lava. O lona uiga, e le o mafai la ona fofoina i le mea lenei faafitauli. O le mea tonu lava lena na ou fai atu ai. O lona uiga, e le na o Faleata la, e aofia uma lava tagata Samoa. Afai e te alu atu nei resitala sau tagata palota i lou itumalo, e mafai lava e le urban ona o atu toe aumai tagata na o ae toe resitala ia latou ae le i atoa le 5 tausaga. O le mea tonu lena o lea na avatu ai le lauga, o lea na avatu ai le

manao, leaga o lea e tupu i lo matou itumalo, e resitala ia matou nei, ae oo taeao toe omai i le isi taavale. O lea ua toe tupu lava le mea sa tatou faia talu ai, a alu i i resitala ai toe alu i le sui lea toe resitala i totonu o le mea lea. O le mea lea o lea e tupu nei, e le na o matou la ae o Samoa atoa lava lea e tupu ai le faatagaga lea ua ave i le Tulafono Tau Faaofi, le tuusaunoaga lea ua ave i sui o Nuu Tu Taulaga.

Lau Afioga, o se mea sese ma le talafeagai, o lea ua ave le favour tusa o lea ua faaese le faiga o lola nei nai lo tatou. E le afaina lava o la e mafai ona o latou e transfer i le lima tausaga, a o le mea lea ua fai nei, lau Afioga, e tatau ona tagai i ai e le sao le mea lea. O le mea lena o lea e avatu ai o matou manatu, sa faapea matou o le mea lena o lea ua aumai ai le suiga, a o lea ua aumai le suiga, o lea ua faamautu mai i le suiga, lea e mafai lava ona transfer sui ia i totonu o le lola Taulaga, e tusa lava pe o lea ua fai e tatou ananafi ma talaatu ananafi. E le sao le mea lea lau Afioga i le Tamaitai Minisita, e tatau ona sui le mea lea, e le amiotonu, e solitulafono. O le a le mea ua ese ai Tulafono e fai i territorial constituencies i itumalo, ese Tulafono e fai mo tagata nei ma sui usufono nei? Ua ese latou ese tatou? A o le a la le mea e le mafai ai ona transfer mai latou ia tatou i totonu o le lima tausaga lenei, matou nei sui o le taulaga? Afai e te tuu maia le avanoa ia matou matou te o atu ai e transfer mai tagata nei e fai e latou talaatu taeao ae matou o atu matou aumai taeao, faafetai, o le mea lena e tatau ona fai. Ae ua fiu ma te lauga atu i exemptions ia, o fea le mea e tuusaunoa a o fea mea e le tuusaunoa?

O lea ua matou lauga atu, aumai la le tuusaunoa i tagata ia e nonofo i totonu o le taulaga i totonu o itumalo o matou, e fai ai le latou filifiliga saoloto e omai ai i itumalo nei e i ai outou e pei o Vaimauga ma Faleata, le mea o la e finagalo ai latou ae faasasa e outou, ae o outou faataga le o atu o tagata ia e o atu i totonu o sui nei. Ua ave tele le faamuamua ma le faamamafa i eleele nei o le taulaga, ae faapefea eleele o Vaimauga ma Faleata lea e i ai i luga tagata nei? Ona outou fai mai lea ua pule mai tua, ia o lena ua outou faia le mea e pule mai ai tua. O lena ua pule mai e matai mai tua totonu o Faleata ma Vaimauga. A o le mea lea e i ai, na o matai lava o Faleata ma Vaimauga e o i totonu i i. Po o fea lava le mea o Samoa e te afio ai, e te faaaloalo i le e ana le itumalo. A o lenei ua toe fai ma lenei mea sese, (.....).
.....).

FOFOGA FETALAI: Malie le sui usufono, ou te manatu...

Tofa Lealailepule Rimoni Aiafi: O lea ua outou faatagaina ai le transfer a tagata nei, lea ua ave ai le favour i tagata nei e toalua, i sui o Itumalo Tu Taulaga, ae faapefea Samoa atoa ma matou nei e tapuai atu, lea e ona le Tulafono Tau Faaofi? E tatau ona sui le mea lea e sese le mea lea lau Afioga, e le amiotonu, e piopio le faiga. Ma lou faaaloalo lava.

FOFOGA FETALAI: O lea ua maua le finagalo o le sui usufono. E i ai se isi mea e ese atu Aveautau?

Tofa Aveau Tuala Lepale Niko Palamo: Lau Afioga i le Fofoga Fetalai, e leai na o le talosaga leaga e tele le afaina o itumalo nei i le vaega lenei o le Tulafono Tau Faaofi. E sao lelei le saunoaga a le usi usufono, e pei o lea e

foliga mai i le Tulafono Tau Faaofi, aua a faaupu le Tulafono Tau Faaofi lenei, tusa e o atu tagata ia e resitala, tusa o tagata ia e nonofo i fanua tumaoti i totonu o nuu Tu Taulaga, i totonu o nuu nei e i ai Faleata ma Vaimauga, a e nofo loa i totonu o nuu nei, pe na e palota i totonu o nuu nei po o fea se i si nuu na e palota ai, o lea ua aumai le mea lea e mafai lava ona transfer mai oe i so o se taimi lava i totonu o le urban. O le Tulafono Tau Faaofi foi lenei, e pei e foliga mai ua faamalosia ai tagata nei e o e resitala.

Aua o le mea lenei o lea ua tupu nei, o lea ua logo tagata ia, afai loa e te nofo i se fanua tumaoti i totonu i i, ua tataua loa ona e restala, transfer i le urban. O lea e tupu i totonu o le Ofisa. Ae i ai lou talitonuga, ave le choice, ave le aiatatau i le tagata po o fea le mea e fia palota i ai. O le mea lenei e tataua ona sau i le Tulafono Tau Faaofi lea, pe afai e manao le tagata e palota i le urban, ona sui lea. E leaga e le o i ai se vaega faapena e puipuia ai le vaega lenei, ona o le taimi nei, e alu atu loa le tagata i o i le Ofisa ona e fai loa lea i ai, e tataua la ona e palota i le urban leaga o lenei e te nofo i le fanua tumaoti. E i ai foi la le vaega lea pei ona ou mauaina, o lea foi e fautua le Ofisa o Faiga Palota i le tagata foi lea e alu atu e fia palota, e manao e palota i le urban, ae le palota i lona suafa matai. O lea e pei e tau tele le fautuaga, alu e palota i lou suafa matai ona e taua atu lou suafa matai.

Ae i ai lou manatu, o le choice lava lenei a le tagata palota, e le o se choice a le Ofisa, e le o suesuea foi e le Ofisa po o fea le mea e fia palota i ai le tagata. Na pau lava le vaega e tilotilo i ai, pe aia....

Afioga Hon FIAME NAOMI MATAAFA: Lau Afioga i le Fofoga Fetalai, o le mea lava e fia faasao....

FOFOGA FETALAI: Tulai mai le Afioga i le Tamaitai Minisita.

Afioga Hon FIAME NAOMI MATAAFA: O le mau lea e aumai, e pei e foliga mai o lea o le a faatonu atu e le Ofisa le mea e palota i ai le tagata. O le Tulafono Tau Faaofi lava ia, o la e faatulaga mai ai agavaa, po o le itumalo faaalaalafaga, po o le Itumalo Tu Taulaga, o la e i ai agavaa.

O le mau lea e faapea mai o le a faamalosia e le Ofisa le mea e o i ai tagata, e sese lenei. Na o le pau lava le galuega a le Ofisa lea e fai, o le faamau i lalo po o le a le mea e fia resitala ai le tagata lea e alu atu.

Lau Afioga i le Fofoga Fetalai, ou te le iloa lava po o le a le sao. Ia na outou tetele mai nei i le faatulagaina o tatou Itumalo Tu Taulaga, ma o outou faapea mai foi i le amataga mai o lenei mataupu, vaeane lava le mamalu o le atunuu, a o tagata nei o tagata ese, ua omai, ua afaina ai palota a itumalo faaalaalafaga o Vaimauga ma Faleata. O lea la ua fai le tatou Tulafono Tau Faaofi e tau vavae ese mai ai le aafia o itumalo faaalaalafaga i ē o lo o fai mai ma afifio i luga o fanua tumaoti. Ia, o lea la ua fai le tatou fuafuaga i lenei, ma o le Teuteuga lava o le Tulafono Tau Faaofi lea, e tataua lava ona ave se faiga e mafai ona faamauina ai tatou Itumalo ia Tu Taulaga fou, aua o lona fou, o lea faatoa amata, ae faitalia ai le tagata palota ia i ona agavaa po o fea le mea e palota ai, po o le itumalo faaalaalafaga, po o le Itumalo Tu Taulaga. O le tali atu lea lau Afioga i le Fofoga Fetalai.

Tofa Lealailepule Rimoni Aiafi: Lau Afioga i le Fofoga Fetalai, o se mea e fia faasao. O lea ua saunoa mai, e foliga mai e le o malamalama le Tamaitai

Minisita i lana Tulafono Tau Faaofi. E manaia tele lana saunoaga mulimuli lea na faaiu ai nei lana saunoaga, le saolotoga o tagata e filifili ai. O le saolotoga tonu lava lena o lea na ou fai atu ai o lea e deny e outou i le Tulafono Tau Faaofi lea e aumai nei. E ese le Tulafono lea, a o lea ua saunoa le Afioga i le Tamaitai Minisita e tasi le lola mo tagata uma, e tatau foi la ona tasi le Tulafono mo tagata uma. E tatau foi la ona tasi le Tulafono lea , tasi le Tulafono mo...

FOFOGA FETALAI: O lea ua maua lou finagalo. Malie le sui usufono mo Faleata Sisifo, se i avatu le avanoa i le Afioga i le Tamaitai Minisita. Tulai mai.

Afioga Hon FIAME NAOMI MATAAFA: Lau Afioga i le Fofoga Fetalai, e leai o lea ou te malamalama lelei lava i le tatou Tulafono Tau Faaofi. Ma ou te faamalie atu i sui usufono, a faapea ua filifili le sui usufono e alu i le urban, ia malilie outou itumalo faaalaalafaga o Vaimauga ma Faleata, ona o le faavaeina o tatou itumalo ia, o lea o lo o tietie foi i luga o tuaoi o outou itumalo, ma o vaega ia o le atunuu, lea o lo o tele ai o tatou fanua umia saoloto, lea ua faavae ai le tatou Tulafono Tau Faaofi lea.

O lea la, e le aumaia aafiaga o outou i le tulaga o le va o tagata e nonofo i luga o latou fanua umia saoloto ma itumalo faaalaalafaga...

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Se i uma ona avatu lea o le avanoa...

Afioga Hon FIAME NAOMI MATAAFA: Ia, o le natura lena o le tatou mataupu, aua o lea e tietie Itumalo Tu Taulaga i luga o outou tuaoi ia faaalaalafaga. Ma le faaaloalo lava.

FOFOGA FETALAI: Ia, se i avatu muamua le avanoa i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, e ese le faigofie o le mataupu. A silasila i Tulafono Tau Faaofi ia ua faataoto mai, e mafai ona resitala tagata Safata nei, ae oo taeao liliu e le sui tauva mo Nofoa ia Tu Taulaga. Na pau lava lena o le mea lea e taumafai atu ai, e fai e le sui tauva mo Safata lana resitala nei, ae oo taeao mafai ona liliu e le urban seat. Na pau lava lena ina ia... o lea e puipuia mai i i, once e resitala ai i Nofoa Tu Taulaga, e le mafai ona toe liliu. Ae peitai la, o lea o le a aafia uma ai tatou, a resitala loa i Siumu taeao, e mafai ona toe liliu i le Itumalo Tu Taulaga talaatu taeao. Na pau lava le mea lea ou te fai atu ai i le lē paleni o le Tulafono Tau Faaofi...

FOFOGA FETALAI: Ia, Aveautau ona faaauau mai lea o le tali faaiu a le Malo.

Tofa Aveau Tuala Lepale Niko Palamo: Faafetai lava mo le avanoa. E leai e faigofie lava le vaega lea matou te taumafai atu ai. O le tagata lava ia e entitle i le urban, e leai se kinship i totonu o Faleata ma Vaimauga, e le

afaina, a sui nei lava sui. A o le mea lea matou te talanoa atu ai, o le tagata foi lea e nofo i Vaimoso o le tagata Vaimoso, a o la e nofo i le fanua tumaoti. O le tagata la lena o lea e mafai ona sui i i... o le vaega lena o le Tulafono Tau Faaofi lea o lea ua mafai ona sui ai, ona e o atu tagata ia o lea ua e nofo i le fanua tumaoti, o lea ua mafai ona e palota i le urban.

O le mea lena o lea e ala ai ona ou finau atu i le Tulafono Tau Faaofi lea, e le tataua lava ona i ai le vaega lea, le exemption lea i i...

Tofa Lealailepule Rimoni Aiafi: Lau Afioga i le Fofoga Fetalai, e le i lauga le sui usufono lea, (*faasino i se tasi o sui usufono mo le Palota Taitoatasi, Susuga Hon Papaliitele Niko Lee Hang*).

FOFOGA FETALAI: Malie le sui usufono mo Faleata Sisifo, se i avatu le avanoa muamua i sui usufono ia e aafia.

Tulai mai se tasi o sui usufono mo Palota Taitoatasi, Susuga Hon Papaliitele ona avatu lea o le avanoa i se tasi foi o sui usufono mo Palota Taitoatasi, Afioga Mauaivaio, sosoo ai lea ma le sui usufono mo Siumu.

Susuga Hon Papaliitele Niko Lee Hang (Palota Taitoatasi): Faafetai i lau Afioga i le Fofoga Fetalai mo le avanoa. E leai ua ou tulai atu ma le agaga faaaloalo ona e fai lava sina ou faanoanoa i saunoaga ia, ona e peiseai o Nofoa ia Tu Taulaga, pei e fai mai e piopio le Tulafono Tau Faaofi, e le sao le Tulafono Tau Faaofi, ona o le mafaufau lea i le Nu'u Tu Taulaga i Sisifo ma Sasae. O le tele ia o lagona na tuuina atu ina ua faataunuaina le suiga o itumalo ia, i le Komiti lea e auai le Afioga i le sui usufono mo Faleata Sisifo Ma sa tuualalo atu i ai i le aafiaga o le Nofoa lea ona o lea e aafia ai itumalo ia o Vaimauga ma Faleata. Peitai ane la o lea ua tulai mai le mea sa ou popole ai, o lea ua toe finau ai a o taeao le palota. E le o finau lava Vaimauga ia i lea mea, peiseai na o Faleata lava ia e tutulai mai e faaali le lē malilie i le mea lea....

Tofa Aveau Tuala Lepale Niko Palamo: O le mea e fia faamalalama lau Afioga i le Fofoga Fetalai.....

FOFOGA FETALAI: Onosai mai sui usufono se i uma ona avatu lea o le avanoa.

Susuga Hon Papaliitele Niko Lee Hang: A o lea foi e manino lava le transfer... Lea fai mai e resitala nei ae transfer taeao. E le sao lea saunoaga. Na pau lava lea o le transfer, a faapea o la e transfer nei i le itumalo faaalaalafaga, e le mafai ona toe transfer mai i le urban, leaga o lea ua pasia le Tulafono o le urban, lea na pasia ia Iuni. O le taimi la lena... A o le mea lea e tulai mai nei.....

Tofa Lealailepule Rimoni Aiafi: Lau Afioga i le Fofoga Fetalai, o le mea lea e leaga le lauga ae le malamalama i le Tulafono Tau Faaofi.

FOFOGA FETALAI: Malilie sui usufono, se i uma ona avatu lea o le avanoa.

Susuga Hon Papaliitele Niko Lee Hang: A o le mea lea ou te tulai atu ai, o lea e tau fesoasoani atu i le mea la e le malamalama ai le la Vaega, aua leaga i lou talitonuga, o lea e sao le Tulafono Tau Faaofi. O le Teuteuga foi lea o le Tulafono Tau Faaofi, na fai faatatau lava mo le Palota Taitoatasi. O lea la ua tulai mai ua toe lava o se aga fai le palota, a o lea lava e vevesi i lenei Tulafono Tau Faaofi, e aofia ai sui mo le Itumalo Tu Taulaga lea e aofia ai maua leaga o Nofoa ia o le Palota Taitoatasi.

FOFOGA FETALAI: Onosai mai o lea o le a uma ona avatu lea.

Susuga Hon Papaliitele Niko Lee Hang: A o le saunoaga lea faapea e resitala nei ae o atu matou sui taeao, e sese. Se i vagana lava tagata sa resitala ae le i suia le Tulafono Tau Faaofi, o la e mafai ona transfer latou pe a finagalo i ai. A o lea foi e malamalama le Tulafono Tau Faaofi, a faapea o e alaala i se freehold, mo new registrations. O lena e i ai le right, a faapea foi la e i ai sou piitaga e te matai i le mea lea e te fia palota i ai, o lena foi e i ai le right, le aiatatau. A o le mea lea ou te faalogologo atu, e pei a tuuaia le Nofoa Tu Taulaga, ua sui ai le Tulafono Tau Faaofi fai mai e solitulafono, piopio.

Ou te talosaga atu lau Afioga, ave i tua ia faamatalaga leaga e le sao.
Ma lou faaaloalo lava.

FOFOGA FETALAI: Ia se tasi o sui usufono mo Palota Taitoatasi, Afioga Maualaivao Pat Ah Him. Malie lava se i faamaea mai lea itu ona avatu ai lea o le tali faaiu.

Tulai mai se tasi o sui usufono mo Palota Taitoatasi, Afioga Maualaivao Pat Ah Him.

Afioga Maualaivao Pat Ah Him (Palota Taitoatasi): Faafetai mo le faaaloalo i i lau Afioga i le Fofoga Fetalai.

E tulai ma le faaaloalo tele aua foi le mamalu o le tatou Malo i lenei taeao. E moni o le Tulafono a le Afioga i le Minisita, faafetai i le Minisita, ae le manufia nofonofo foi a o lea lava e le o toe po lava malae i sui usufono o lo o tauaveina nei ia le.....e moni lava e le o atoatoa, a o lea o lo o i luga lava o le agaga ia sui nei o Itumalo Tu Taulaga. O le faigata ia o lafoga e fai, ae faapena ona tatou faatamalii pea. E taua le mataupu. Ma o ni lagona faaalai i sui usufono foi o itumalo o lo o mafatia po o afaina o latou finagalo i le Tulafono Tau Faaofi, ia te au lava latou i lau vaai i le Tulafono Tau Faaofi, a silasila foi i le mea o lo o atugalua ai ia sui usufono mamalu. O lo o i ai le itulau e lua o le “(3) Section 3 16(3) and (4) applies to a registered voter in an urban constituency if the voter wishes to be transferred to another urban or territorial constituency.” Sau loa i le vaega e “(4) As an exception to section 16(3) and (4), a registered voter in a territorial constituency may,” o lona uiga a oo mai foi la i le faa-Samoa; “(4) I le avea ai o se tuusaunoaga i le fuaiupu 16(3) ma le (4), e mafai e se tagata palota taitoatasi ua faamauina i totonu o se itumalo faaalaalafaga, i so o se taimi, ona faaliliuina atu lona faamauina i se itumalo o nuu i le taulaga, pe afai e agavaa.” A silasila i le fuaiupu e 3 lea i le faasamoaina; “(3) E faaogā le fuaiupu 16(3) ma le (4) i se tagata palota taitoatasi ua faamauina i totonu o se itumalo o nuu i le taulaga, pe afai e manao.” E faapena foi la e pei ona saunoa ia se tagata e sau toe nofo i totonu

o nuu Tu Taulaga ia, o la e i ai le avanoa e tuusaunoa ai, e le o faapea o faamalosia. O lau lena faitau i ai.

FOFOGA FETALAI: Malo. O lea ua maua lou finagalo le sui usufono.

Afioga Maualaivao Pat Ah Him: Lau Afioga i le Fofoga Fetalai, e taua ia....ae faamolemole, e le o taumafai ia nei foi sui usufono e o e liliu faamalosi tagata, e leai, e faamalamalama ma faalauiloa ma penefiti e maua ai i nei foi itumalo pe a faapea e.....A o le agaga lena, lea ou te tulai atu ai ma le faafetai tele, ia manuia le tatou Fono.

FOFOGA FETALAI: Malo. Le sui usufono mo Siumu, ona avatu ai lea i le sui usufono mo Faleata Sasae.

Tofa Hon Tuuu Anasii Leota (Siumu): Faafetai tele lau Afioga i le Fofoga Fetalai. Ua ou tulai atu ona o lea sa taua au ma le matou itumalo e le Taitai o le Itu Agai. Ae ua ou tulai atu, e faasao, e sao le saunoaga a le sui usufono mo Faleata Sisifo. O le mea lena o lea e tupu nei. O lea e pei e faapito le Tulafono i le Urban Seat, o lea ua faataga pe tasi lua vaiaso talu ona liliu itumalo, ae mafai la i i, ona toe liliu i totonu o le Urban Seat i le lua vaiaso. O lea la ou te tulai atu e sao. E le sao le mea lea. E tatau ona tutusa le umi e tai lima tausaga. A faapea o lea ua liliu mai i i le vaiaso lea, taofi, e le tatau ona toe mafai ona toe liliu. O lea e lagona ai le faanoanoa, sa tatau ona talia se tuualalo, faataatia ai faapea le nofoaga lea, palota taitoatasi. Se i uma le Paeaiiga lenei, ona o lea ma le mautinoa e le toe i ai se Palota Taitoatasi, ia ave Nofoa ia mo Faleata ma Vaimauga.

FOFOGA FETALAI: O lea ua maua le finagalo o le sui usufono. Le sui usufono mo Faleata Sasae e toe i ai se isi mea?

Tofa Aveau Tuala lepale Niko Palamo: Lau Afioga i le Fofoga Fetalai.....

FOFOGA FETALAI: E i ai se isi mea lau Afioga i le sui usufono mo Faleata Sasae e ese atu o lea ua ou malamalama i lou finagalo?

Tofa Aveau Tuala Lepale Niko Palamo: Ioe, e fia faamalamalama ia saunoaga a sui usufono mamalu ia o lea na saunoa nei. O le vaega muamua, o le upu lea e sau i le Tulafono, at any time. Pau lava lena o le vaega. Ana faapea e leai le vaega 4, le mea lea e faaopoopo i lalo o le 4, le Section lea ua ave i ai i le uban voter, e manaia lava le Vaega 3 uma ai i ina le Tulafono Tau Faaofi, e tutusa uma ai ma tagata territorial, lima tausaga sui, tutusa uma. Ae toe sau lava le vaega lea, at any time, i so o se taimi. O le mea lea e ala ai ona.....

FOFOGA FETALAI: O lea ua maua le finagalo o le sui usufono. Le sui usufono mo Faleata Sisifo, e tasi lava lea ona avatu loa lea o le avanoa i le tali faaiu.

Tofa Lealailepule Rimoni Aiafi: Faafetai. O le ala tonu lava lea e ala ai ona umi tatou Fono, o le ave o le avanoa i tagata e le i lauga i le Tulafono Tau

Faaofi. O lea la e lauga mai, e matua le malamalama lava i le Tulafono Tau Faaofi.....

FOFOGA FETALAI: Le sui usufono mo Faleata Sisifo, ou te avea le avanoa leaga o lea na e taua itumalo ia. E le mafai ona le tuua le avanoa, ona o lea na agiga itumalo nei e tataua ona tatou faaaloaloga.

Tofa Lealailepule Rimoni Aiafi: Faafetai. E faamalulu atu ai i lau Afioga. O lea la ua tulai mai isi sui usufono, faitau mai le Tulafono Tau Faaofi. Ia a faitau mai le Tulafono Tau Faaofi e tutusa lava le Tulafono Tau Faaofi lea e te faitau ai, ae e te le o malamalama a o lea matou te malamalama? Lau Afioga i le i le sui usufono mamalu, lea ua saunoa mai le.....faapea mai e le tataua ona transfer.....

Afioga Mauaiva Pat Ah Him: Lau Afioga i le Fofoga Fetalai, e faailoa atu lava i lau Afioga.....

FOFOGA FETALAI: O le mea lea e tupu ai le lagalaga o le tatou Fono, agai i le Tulafono Tau Faaofi ae aua tou te agai i sui usufono.

Afioga Mauaiva Pat Ah Him: Ia o lona tonu lava, faafetai.

FOFOGA FETALAI: Malie se tasi o sui usufono mo Palota Taitoatasi e le o ni ai avea. Malie le sui usufono mamalu, o lona lava na manino lava lau saunoaga.

Afioga Mauaiva Pat Ah Him: Faafetai, o le ava ma le faafetai lava.

FOFOGA FETALAI: Le sui usufono mo Faleata Sisifo?

Tofa Lealailepule Rimoni Aiafi: Ma le faaaloalo lau Afioga i le Fofoga Fetalai, o lauga ia e fai atu e le o agai i sui usufono, e faamalulu atu i sui usufono mamalu, o lea e agai i itumalo, o lea e agai i i. O lea na fai atu ai, o Tulafono, na tatou faia Tulafono, ia paleni le Tulafono. O lea ua saunoa mai, e tasi le Lola, e tataua foi la ona tasi le Tulafono. Saunoa mai le Afioga i le Minisita, ia outou malilie pe a ua o tagata i le Urban. Ou te le o ita i lona mea. E pule le tagata. O le mea lea e taumafai i ai, o le saolotoga o le tagata. A o le a le mea e le taofia ai le saolotoga o le tagata la e fia sau i le Urban i totonu o le TC? Pei ona ou fai atu ai i le amataga. Aisea ua taofiofia ai le right lona? Tou te fiafia e ave le right i le tagata e fia alu i le Urban ae faasa ai fua le right o le tagata la e fia sau i totonu o le TC i lona saolotoga? O le mea tonu lava lona o lea ou te fai atu ai o lona. (.....).

Ma le isi mea lau Afioga, o le mea lea e faapea mai ai.....

Afioga Hon FIAME NAOMI MATAAFA: Lau Afioga i le Fofoga Fetalai. O se mea lava e fia faasao.

FOFOGA FETALAI: Malie le sui usufono mo Faleata Sisifo. Tulai mai lau Afioga i le Minisita.

Afioga Hon FIAME NAOMI MATAAFA: A silasila i le fuaiupu e 3, o lena o lo o avanoa lelei ai, tagata o lo o i totonu o le Lola Palota mo Itumalo Tu Taulaga, e sui ai i Itumalo Faaalalafaga. O lona uiga, o lea foi e mafai ona agai i le isi itu, aua pei o lea ua malolosi mai ia saunoaga a sui usufono faapea, na o le alu tasi lava i totonu o Itumalo Tu Taulaga. A outou silasila lelei i le Tulafono i le fuaiupu e 3, o lena o lo o tau mai ai, e tele lava le avanoa e sii atu ai i latou o lo o i totonu i le lisi o le Itumalo Tu Taulaga i se isi Itumalo Tu Taulaga po o se isi Itumalo Faaalalafaga.

Lau Afioga i le Fofoga Fetalai, o lea lava o le a fefoifoiai ia sui usufono i luga o le mataupu, a o lea e faamalamalama atu le uiga o le tatou Tulafono Tau Faaofi. O le mea moni lava, o le suiga lenei, aua ana faapea e le sua, o le mea e tupu, o nei, o atu tagata sui atu i totonu o le Itumalo Tu Taulaga, o taeao e mafai ona toe o ese mai tagata na lea na lesitala nei, toe foi mai i tua. E mafai ai lava e le Tulafono ona faapena ona fai. A o le Teuteuga la lea ua aumai e tamau ai, aua loa ne i toe feoai. A ua fai lau filifiliga mo le Itumalo Tu Taulaga, ona tutusa ai loa lea ma isi lava o tatou itumalo. Lau Afioga i le Fofoga Fetalai, o lena.

FOFOGA FETALAI: Ou te manatu ua malamalama le tatou mataupu. Malilie sui usufono mamalu mo Faleata Sisifo ma Faleata Sasae. Ou te talitonu o lea ua sautualua sautuatu le tatou...malie lava se tasi o sui usufono mo Vaimauga Sisifo, Tofa Lenatai Victor Faafoi Tamapua, e manatu lava o lea ua manino ma malamalama le folasaga a le Minisita. O lea foi ou te mataitu ma ou vaavaai i le faamalamalama. Ae talosaga atu i sui usufono mamalu, tatou malilie ia, tatou faaalu le Tulafono Tau Faaofi. Ou te talitonu lava e le o le Faiga Palota mulimuli lenei. Se i o tatou mataitu. O le atugaluga lea e atugaluga i ai Faleata Sisifo ma Faleata Sasae, e taua foi lo oulua finagalo, a o le faamalamalama lea na faamalamalama e le Minisita, tuu le faitalia i le tagata palota e decide, po o fea e fia alu i ai? O le agaga lena o lea e aumai. Ona filifili lava lea, a loto le tagata i lana faamalamalama o ia e fia palota i i, ona agai lea i ai. A o lea ua ave le aiatatau i le tagata e filifili ai ia, po o lona fanua tumaoti ma lona fanua Tu Taulaga po o lana aia i le tulaga.....

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Alaala i lalo le sui usufono mo Faleata Sisifo. Ona ou manatu lea, malilie sui usufono, ua manino ma malamalama. O lea ua saunoa faai le Afioga i le Minisita, ia o le tali lena a le Malo. Po o le a lava le mea e umi ai le tatou finauga, o lea ua logona lo oulua finagalo. E taua foi lo oulua finagalo i le feoai o sui usufono mamalu po o totonu o Faleata Sasae po o totonu o Faleata Sisifo, ae ave. O le decision mulimuli i le mea lenei, o le tagata palota. E filifili laia o ia po o fea e alu e palota i ai. Pe fai lona loto i le traditional, pe fia alu e lagolago i sui fou ia Maualaivao ma Papaliitele. Silasila la i le manino o le mataupu. Ae oulua malilie ia. O lea lava e toa le tai ia Vaimauga, leai ma se gae o Lefau ma Lenatai. Ona e a? E le o tutupu ia mea. Malilie sui usufono, ua ou faamutaina le mataupu.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Le sui usufono mo Faleata Sisifo?

Tofa Lealailepule Rimoni Aiafi: E le toe oo se manatu i le Tulafono.

FOFOGA FETALAI: Ia ua uma le tatou mataupu.

Tofa Lealailepule Rimoni Aiafi: E pau lava le mea lea e ofo ai lou sui usufono, leaga o lea e pei e faapea le vaega lea, e fai atu o finau mo au mo se isi. E leai, afai ua tasi le Tulafono mo tagata uma, tasi mo tagata uma, e tatau ona polapuipui i le Tulafono e tusi e tatou, a o lenei mea o le palota, e tolu ou suti fou la ua uma ona sui, mo suti.....faafetai.

FOFOGA FETALAI: Ia tatou malilie, o lea ua maua, malie le sui usufono, o lou lava lea finagalo. Vaai lelei ou sui na vaai se suti e te alu ai i le lagi.

Tofa Hon Tolofuaivalelei Falemoe Leiataua: Lau Afioga i le Fofoga Fetalai.....

FOFOGA FETALAI: Ia.

Tofa Hon Tolofuaivalelei Falemoe Leiataua: Ia faafetai. Lau Afioga i le Fofoga Fetalai, e nofonono lava ae.....e fai lava sina matuia o lafoga lea e faalogo i ai. O le Tulafono piopio, e fai mea piopio. O ni upu e faauigalua. O ni upu ua taufaifai, a o le Tulafono, ua tapena e le Malo e ala i le fautuaga a le Minisita ma le Loia Sili, o lea lava e talafeagai. O le key word lea ou te manao ia malamalama ai le toalua lea o le sui usufono mo Faleata Sisifo ma le sui usufono mo Faleata Sasae, e le afaina le sui usufono mo Aana Alofi Nu 3, o la lava e lelei le sui usufono. Ua oulua popole lava i le upu lea e fai mai, o le may, at any time. O le upu lea e faaoga e tatau ona oulua silasila i ai, 'if the voter is qualified, that's the job of the Electoral Officer.' E le faia e oulua le mea lena.

Tofa Lealailepule Rimoni Aiafi: Lau Afioga i le Fofoga Fetalai.....

Tofa Hon Tolofuaivalelei Falemoe Leiataua: Nofo i lalo o lea e fai lau tala le sui usufono mo Faleata Sisifo. Faaaloalo mai o au o le Mataia. Alaala i lalo. Ia e silafia le vala lena. A o lea ua ou fai atu. O lea e sagatonu le faamalalamamaga, ae o le faalavelave, ua alu solo outou finagalo, ona o le popolega lena e ia te outou. A o le uiga moni lava o le Tulafono Tau Faaofi lea, o lea ua fai e le Malo le Teuteuga e tusa o outou finagalo na aumai i le la vaiaso. E leai se mea piopio o i ai, e leai ni mea alualua o i ai. O le Tulafono Tau Faaofi o lo o mama tapena, ae o le tatou faamoemoe, ia faamaoni tagata o le Ofisa, ia ogatasi ma le Tulafono Tau Faaofi lenei. O le Tulafono Tau Faaofi o lea na faavae le Teuteuga lenei i luga o le fautuaga a le Loia Sili. E le o soona faia e le Malo se mea. O le mea lea, se i onosai outou, se i tatou o i le Faiga Palota o le 2016 pe i ai ni lape. Ia o mea uma lava na e toe tapena e le Faigamalo pe a toe tulai mai le Faigamalo fou. Ma le agaga faaaloalo.

FOFOGA FETALAI: Malo.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Le sui usufono mo Faleata Sisifo?

Tofa Lealailepule Rimoni Aiafi: Ona o lea ua agai mai ia maua.

FOFOGA FETALAI: Ia e le o ni ai avea o la outou lava mafutaga e masani ai. Ae malie maia o lea o le a faasolo le tatou galuega.

Tofa Lealailepule Rimoni Aiafi: E foliga ma te le malamalama i le Tulafono Tau Faaofi. O le issue lea e i ai, o le transfer. Ia tutusa le transfer ia tatou uma tai lima tausaga, o le issue lena. O le issue ia e saunoa mai ai le Afioga i le Minisita, e ese le mea la e sau ai, e sese le mea la e sau ai, ioe, ae ui i lea. O lea ua fai atu, o le upu lea popole lau Afioga, e te fiu e sue i lau dictionary e le maua ai. Na o le Peace of the Lord in my heart, ioe, ua tele tupe, o le a.... i sui tauva e o e tauva mai i le.....

FOFOGA FETALAI: Le sui usufono mo Faleata Sisifo, ia ogatusa lau saunoa ma au amioga. A e saunoa loa i le Peace of the Lord, na o mea Peace lava e te faia, a o le mea lea e tulai atu, o lea e taumafai e fofo atu nei le masasau o au saunoaga. Ona faapea lea o se fautuaga, le paia ma le mamalu o le tatou Maota Fono, ia seu pea le manu ma tagai i le galu. E le na o tatou lea e Fono. O la e faafofoga mai le atunuu e pei ona taua e le Minisita, ia atagia faapea ua tatou le manatu mamafa ma faataua Tulafono Tau Faaofi o lo o tapena mai e le Malo, aemaise ē o lo o aafia ai, e le na o le Malo ma le Kapeneta, o lo o aafia ia Loia silisili, Loia Sili a le Malo, ana silafia se mea o faaletonu ma se mea pei ona taua i le finagalo o le sui usufono o mea piopio, ou te manatu e le oo mai lea Tulafono Tau Faaofi. Ma ou te fautuaina, e aveese upu ia. E fai sina tuga o lafoga ia a le sui usufono mo le tulaga o Tulafono lē mafaufau ma Tulafono piopio ma Tulafono..... O lo o aafia tele ai nai sui usufono ia e tulai mai.

E faamalulu atu ai i sui usufono mo Palota Taitoatasi, Afioga Maualaivao ma le Susuga Papaliitele. O oulva Nofoa o Nofoa o lea e tau faufau po o fea tonu le tulaga e tatau ona i ai. Ia toa pea le tai, ae ia malilie le Maota, ave le avanoa o Nofoa fou se i o tatou mataitu po o fea le tulaga e i ai. E le uma le fai aso o le Alii. O nisi mea, ia ona aveifo lea o atugaluga a o la ua lagona e le Malo, o le tulaga tonu lea e tatau ona i ai. Tulai mai se tasi o sui usufono mo le Au Palota Taitoatasi, Afioga Maualaivao Pat Ah Him.

[Upu na faatonu e le Fofoga Fetalai e aveese ma Faamaumauga i le Saunoaga a le sui usufono mo Faleata Sisifo:.....Ou te ofo ia te outou i le tou fai o lenei mea piopio. A ou taua le mea lenei, o le mea piopio, o le mea le sao, o le mea le amiotonu. E sese ai le Tulafono, e piopio ai lau Tulafono].

Afioga Maualaivao Pat Ah Him: Lau Afioga i le Fofoga Fetalai, faafetai mo lau saunoaga. Faafetai foi i le tatou Malo e tusa ai ma le Tulafono Tau Faaofi. Na pau lava le mea e faafetai ona o Nofoa fou, ae ua outou silafia foi e leai lava se tagata e le fia tietie i se taavale fou. A fou foi le Nofoa, ia e faapena foi ona naunau tagata, ioe, i le tulaga lea.

Na pau lava le mea, sa saunoa le sui usufono mo Siumu e lagolagoina le mau sese lea e sau mai i o, pe e te finagalo malie, aveese foi ma faamaumauga ia leaga o lea e lagolago e le sui usufono lea. Ma lou faaaloalo tele. Faafetai.

FOFOGA FETALAI: Ia se i avatu atu le avanoa i le Afioga i le Palemia. Tulai mai lau Afioga i le Palemia.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, e i ai le lafo mo le faasaoina o faaliliuga e faapea:

“FAASAOGA:

Ina ia aveese upu “Tagata Palota Taitoatasi” i so o se mea o aliali ai ae suia i upu “Tagata Palota ua Resitalaina.”

O le suiga leni, ona ua le o toe i ai se Lola o le Au Palota Taitoatasi ma ua le toe aofia i lalo o se Tulafono lea definition. O lo o sao le faa-Peretania, “registered voter” ae sese le faa-Samoaina, ona ua tutusa uma tagata palota i le taimi leni i lalo o le Tulafono.

Faaluaina e le Sui Palemia, Minisita mo Pisinisi, Alamanuia ma Leipa ma le Minisita mo Faamasinoga ma Pulega tau Faamasinoga.

Faamaonia le Faasaoga.

FOFOGA FETALAI: Ia o le a fetuunai pea e le Fofoga Fetalai, ae ou te ilo o lo o sagatonu ona e le i taua se faaletonu i tulaga ia ogaoga lea sa ou taua.

Malie le sui usufono mo Siumu e le o ni ai avea le saunoaga a le Afioga i le sui usufono mamalu.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (Nu.4) 2015 i lona faitauga faalua.

TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA GAOSIA I LE ATUNUU 2015 - iloiloga auiliili

FOFOGA FETALAI: Talu ai ona ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu i Le Ao o le Malo e uiga i le Tulafono Tau Faaofi leni, o lea o le a sagai atu loa le Fono Aoao mo le Iloiloga Auiliili.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le Faamatalaga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Fua Faatatau o Lafoga o Oloa Gaosia i le Atunuu 2015.

Faamaonia.

Na faagasolo le Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2015 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O FAIGA PALOTA (NU.4) 2015 - iloiloga auiliili

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu i Le Ao o le Malo e uiga i le Tulafono Tau Faaofi lenei, o lea o le a sagai atu loa le Fono Aoao mo le Iloiloga Auiliili.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le Fuaiupu 19.

FOFOGA FETALAI: Ia, se i tulai mai le sui usufono mo Faleata Sasae, lau Tofa Aveautau.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, ona o le Faanatinati o lenei Tulafono Tau Faaofi ua le mafai ai ona oo atu i le Komiti, o lea ou te tulai atu ai pe mafai ona faatu se lafo lau Afioga.

FOFOGA FETALAI: O le a le mataupu?

Tofa AVEAU TUALA LEPALE NIKO PALAMO: Ou te fia faatu se lafo, *Ina ia aveeseina le fuaiupu 4 mai le Vaega 2 o le Tulafono Tau Faaofi. Le fuaiupu 4 lea e faapea; "i le avea ai o se tuusaunoaga i le fuaiupu 13(3) ma le (4) e mafai ai e se tagata Palota Taitoatasi ua faamauina i totonu o se Itumalo Faaalaalafaga i so o se taimi ona faaliliuina atu lona faamauina i se Itumalo o Nuu i le Taulaga pe afai e agavaa le tagata Palota Taitoatasi mo le faamauina i totonu o le Itumalo Tu Taulaga."*

Ma le faaaloalo lava.

Faaluaaina e le sui usufono mo Faleata Sisifo.

FOFOGA FETALAI: Ia tulai mai lau Afioga i le Tamaitai Minisita.

Afioga Hon FIAME NAOMI MATAAFA: Lau Afioga i le Fofoga Fetalai mo Faamaumauga o le tatou Fono, ou te tulai atu e fai ma sui o le Malo e teena le Lafo Toe Teuteu.

Faaluaia e le Sui Palemia, Minisita mo Pisinisi, Alamanuia ma Leipa.

FOFOGA FETALAI: Ia e fai lava tatou tulaga masani ona avatu lea o le fesili ona faalogo lea o le Fofoga Fetalai po o fea e falala i ai.

Na teena le lafo.

Tofa Aveau Tuala Lepale Niko Palamo: Lau Afioga i le Fofoga Fetalai ou te talosaga atu pe mafai ona fai se Palota Tauvalaau.

FOFOGA FETALAI: E le o faaletonu taliga o le Fofoga Fetalai, ua lava lea. I take the discretion ua manumalo le Leai.

Faamaonia le Fuaiupu 2.

FUAIUPU 3: Ua soloia le Fuaiupu 22.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Faiga Palota (Nu.4) 2015.

Faamaonia.

Na faagasolo le Tulafono Tau Faaofi o Teuteuga o le Tulafono o Faiga Palota (Nu.4) 2015 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O FUA
FAATATAU O OLOA E GAOSIA I LE ATUNUU 2015
- faitauga faatolu**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona saina e Lana Afioga Mamalu i le Ao o le Malo e uiga i le Tulafono Tau Faaofi lenei, o lea o le a sagai atu loa le Fono Aoa mo le faitauga faatolu.

Tulai mai lau Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2015 i lona faitauga faatolu.*

Faaluaina e le Sui Palemia, Minisita mo Pisinisi, Alamanuia ma Leipa ma le Minisita mo Galuega tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

TULAFONO TAU FAAOFI O TEUTEUGA O LE TULAFONO O FAIGA PALOTA (NU.4) 2015 - faitauga faatolu

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona saina e Lana Afioga Mamalu i le Ao o le Malo e uiga i le Tulafono Tau Faaofi lenei, o lea o le a sagai atu loa le Fono Aoaofaitulafono mo le faitauga faatolu.

Tulai mai lau Afioga i le Minisita mo Faamasinoga, Pulega tau Faamasinoga ma le Komisi o Faiga Palota.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu.4) 2015 i lona faitauga faatolu.*

Faaluaina e le Minisita mo Galuega tau Alamanuia, Minisita mo Tupe Maua ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

LAFO MO LE TOLOPOINA

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, ou te manatu e pei lava ua agai i le 20 Tulafono ua tatou pasia i lenei Fonotaga, ma ua tauau lava ina manatu nisi o latou o ni Loia e toe soloia Tulafono.

Ae tatou te le i oo atu i lenei tulaga matautia, o lea ua ou tulai atu ai e faatu le lafo, *Ina ia tolopoina nei Taulumaga a le Fono Aoaofaitulafono seia aulia le Aso Tofi, 27 Aokuso 2015.*

Faaluaina e le Sui Palemia, Minisita mo Pisinisi, Alamanuia ma Leipa ma le Minisita mo Galuega tau Alamanuia ma Atinae a le Malo.

Na faamaonia le lafo.

Afioga Toeolesulusulu Cedric Pose Salesa Schuster: Lau Afioga i le Fofoga Fetalai, faamolemole lava ona o lea e maitau atu o le lafo o le aso 27 Aokuso, po o le a le sao?

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Ia, o le aso 27 o Aokuso 2015.

FOFOGA FETALAI: O le 27th of August, o le aso lena o lea o le a tolopo i ai le tatou Fono.

Ia, ou te manatu ua tatou taunuu ai i le taunuuga o tatou galuega faatulagaina o lenei aso. Le paia e ma le maualuga o le tatou Palemene, e i ai le faamoemoe e le mafai ona taia i fale le paia ma le mamalu o le tatou Maota i lenei itula o le taeao, ona e talitonu ua tatou faaiumea i lenei aso. O lea ua tapau ti'a o le tautiaga aua la outou faalelegafulu aemaise foi o lea ua tautau le upega-lauga, ua mativa foi le fau ma papau le laulau aua le feagai ai o le tatou Maota Fono nei ma le tatou Fonotaga sa tatou feagai ai mai lena vaiaso seia oo mai i le aso.

E momoli atu ai le agaga faafetai tele i le paia ma le mamalu o sui usufono mamalu uma o le tatou Maota Fono, malo le onosai malo le tauatai, faamalo foi le saunoa, faamalo fetalai, faamalo le tauatai e uiga i le tauvagameaina o le tatou galuega.

O a a tatou upu ma tala o suaga a le vaatele i totonu o le tatou Maota, e talitonu lava e le faigofie i lo outou finagalo le tofasaili ma le tofamomoli. E leai foi ni upu e afeifeia po o ni upu e mili faauu pe a tatou o e lipoi upu a le atunuu. A o le tuualalo lava ia a le Fofoga Fetalai i tulaga e masani ai, tatou te tutu pea i le too ae tepa i le ata ma o tatou seu pea le manu ma tagai i le galu. E fai foi o lena a o lenei aua o tatou e faalele ae o lo o maitau le atunuu. O le agaga faafetai ua tatou taunuu i le taunuuga o le tatou Fonotaga faaii i lenei aso ma e manatu o le tatou Fonotaga faaii foi lea i totonu o le tatou Maota Fono lenei i Tiafau.

O le aoauli nei, o le a agai mai ai le konekarate e tapenapena uma le tatou setup lenei. O le mea lena tou te alaala ai i o outou nofoa ma tatou kesi uma nei, e tapenapena aua le tatou faamoemoe o le tatou agai atu i Tuanaimato pe a maea taaloga o lo o sauni foi i ai le tatou Malo e talimalo ai.

A o le tatou Fono i le Aso Tofi, 27 o Aokuso, tatou te agai foi i le Tuiatua (TATTE) e tatou te talitali ai e uma loa Setema, le faaiuga o Setema, o le isi tatou Fono e sosoo ai ia Oketopa, ona tatou Fono loa lea i le nofoaga o le a faatulagaina e tatou te taumavae ai ma faaii ai lenei Paeaiga, ma faafeiloai ai le Paeaiga fou. O le agaga lena ina ia nofoilo le vaa o le tamaloa i tapenapenaga aemaise o polokalame a sui usufono taitasi, ina ia agai i ai fuafuaga e tapenapena malie a outou pepa.

E tatalo atu ma le faaaloalo i le paia ma le mamalu o le tatou Maota i le aso, e tatau ona e afio ma ave uma le tulaga o au meatotino, le sui usufono lava ia, tuu ai na o tou wallet i ina e o atu i ai le aufaigaluega, a o a outou pepa ma mea uma, ia malilie sui usufono ave uma tatou mea e masani ai, ona o tatou, e tatou te le toe foi mai i inei. O lea o le a tatou agai loa e tapenapena a tatou api ma faamaumauga ma mea uma sa tatou feagai ai i lenei 5 tausaga ae se i omai le aufaigaluega ua lautogia e talatala malie le tatou setup lenei ma teu faalelei aua le agai atu mo le tatou faamoemoe i Tuanaimato.

Ae le faaitiitia le agaga faafetai atu i le paia ma le mamalu o le tatou Maota i ona tulaga faalupe i lau Afioga i le Palemia ma lau Kapeneta. Malo le tofa, malo le onosai, malo le galulue. E talitonu lava, o a foi ni tulaga i saunoaga ma tuleiga a sui usufono mamalu, o i ina o lo o i ai le tofa ma le faautautaga loloto e toatai pea lau Afioga i le Palemia. O a foi tulaga i le naunau atu o sui usufono, ia outou finagalo malilie e le valetuulima, o fautuaga lava mo le lelei, pe paopapa, pe le tautamalii pe taulaulu i la outou faafofoga, e faamoemoe o outou o lo o outou tutu i le foe o le Malo, e faatonutonu folau ai pe lelei pe faaletonu, o lo o i ina le uta a le faimea tou te saili i ai ma faatino tulaga e pei ona i ai.

A o lenei aso, e momoli atu foi le faafetai tele i lau Afioga i le Taitai o le Itu Agai, e le o ni ai e avea lo outou finagalo. Faamalo foi i le tauavagameaina o le tatou Fono. E talitonu lava le faamoemoe e faataua lo outou finagalo, ona o se Itu e Agaia le tatou Malo, o lo outou lea valaauina. Malo le onosai, faamoemoe i le Alii. O le tatou savaliga ma le tulaga e pei ona i ai, o lo o silasila fofoga o le Atua i lo outou augani ma lo outou faamanatu ma lo outou fautua ina ia manuia galuega a le tatou Malo.

Ona faatai lea ma se leo i lenei vaega o le taeao, le paia e ma le mamalu o le tatou Maota Fono, ia tatou tatalo pea i le Atua ina ia tatou aulia le aso ua atofaina e tuupoina ai le tatou Fono, aemaise le faamoemoe ina ia taunuu ma le manuia.

Faafetai atu foi i le tapuaiga Samoa i lenei vaega o le aso, o lea ua suni tau i le tini le faamoemoe a lou Palemene. E momoli atu le faafetai tele Samoa ona o lau tatalo ma lau tapuaiga. E tatalo pea i le Alii e foai pea le ola ma le malosia aua la outou fatuaiga tausi o le tautuaina o tatou nuu i le pule mamalu a alii ma faipule, faletua ma tausi, saoa ma tamaitai ina ia taatia pea i lagatonu le atinae ma le filemu aemaise o se manuia filemu mo Samoa mo a taeao.

Ae le i faaiuina le tatou Fono i lenei aso, e faafetai atu i Ofisa Sili o Pulega ma Pule Sili o Matagaluega ma Faalapotopotoga a le Malo ua tatou mafuta, ia maua lo outou soifua manuia.

Ou te tapa ai lau Afioga i le Tamaitai Minisita Lagolago, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow e faia le tatou tatalo faaii ona tatou malolo ai lea.

Na tolopo Taulumaga a le Fono Aoao Faitulafono i le itula e 10.48 i le taeao seia aulia le itula e 9:00 i le taeao, Aso Tofi, 27 Aokuso 2015.